

Pelitup muka biji benih

Agensi



NITIN (kiri) dan pelitup muka mesra alam keluaran syarikatnya. FOTO Agensi

New Delhi: Aktivis alam sekitar dari Mangaluru, Karnataka, India menonjolkan kreativitiya dengan mencipta inovasi pelitup muka mesra alam yang diperbuat daripada biji benih.

Hindustan Times melaporkan, Nitin Vas, melalui syarikat sosialnya, Paper Seed Co, sudah menghasilkan produk kitar semula dan menggunakan biji benih sejak tahun 2017.

Dia bereksperimen dengan mengeluarkan pelitup muka jenis itu, selepas tercetusnya wabak Covid-19.

Nitin berkata, inisiatif itu dapat membantu melindungi alam sekitar ketika penularan pandemik berkenaan.

"Kami menghasilkan pelbagai barangan berasaskan biji benih, dengan salah satunya pelitup muka.

"Matlamat utama kami adalah untuk memberi produk alternatif iaitu pelitup muka mesra alam," katanya kepada Life Beyond Numbers.

Nitin memperkenalkan pelitup muka itu pada Mac tahun ini.

Antara produk pernah dihasilkan syarikatnya adalah pensil, pen, kad jemputan, kad lawatan, dan buku kecil yang apabila dibuang ke tanah berkembang menjadi tanaman.

"Kami memberikan latihan kepada wanita dan pemuda di kampung terpencil, termasuk penggunaan bahan mentah untuk menghasilkan barangan berkenaan.

"Pelitup muka yang kami hasilkan adalah boleh biodegradasi dengan talinya diperbuat daripada kapas.

"Keistimewaannya kerana ia mengandungi biji benih yang tersimpan di dalamnya dan boleh tumbuh jadi tanaman," katanya.

Menurut Nitin, dia pada mulanya mengedarkan pelitup muka itu secara percuma, tetapi kini tidak lagi.

"Bagi mewujudkan peluang pekerjaan kepada penduduk luar bandar, kami menjualnya dengan harga 25 rupee (kira-kira RM1.40) dan ia adalah buatan tangan sepenuhnya.

"Selain India, syarikat kami turut menerima sebahagian besar pesanan dari luar negara," katanya.

Bahagian luar pelitup muka itu diperbuat daripada kapas yang dikumpulkan dari industri tekstil, manakala lapisan dalam diperbuat daripada kain kapas lembut.

Disiarkan pada: Ogos 26, 2021 @ 6:30am